

胡文忠公遺集

胡文忠公遺集卷六十九

長沙鄭敦謹

湘鄉曾國荃

編輯

復多都護

己未十二月二十九日

來示欲以陳德園六營趕移太湖查陳德園爲羅田
蘄州蘄水黃岡緊要門戶未可空虛現祇會事恆兩
營且係新募之勇未經戰陣不足以與唐營換防太
湖城圍當防援賊分股內外衝犯遽難鬆勁麾下與
鮑蔣三軍萬三四千人前臨大敵固知不敷分佈第
思零星添撥不能出奇制勝仍是處處皆單卽再撥

七八千人亦無尺寸之益仍請仁兄設法兼顧堅忍以待至初旬密謀定計約會山內二十餘營內外夾攻使賊首尾不能相應則一戰而勝屠狗可期奉漏卮而注之何如沃焦釜而圖之也

復多都護

二十九日

奉賜書以該逆近逼霆營恐致糧道不通全軍不能穩守囑催陳德園之軍於三日內赶到惟是霆營力單弟早已慮及龍家涼亭八營尙可策應至陳德園之二營有未便調之處此外無兵可撥卽欲移緩就急亦非三日內可能赶到林翼苦思焦慮與其撥來

撥去毫無補益不如挾全勢全力以勦爲主所望仁
兄多方鎮定隨時以馬隊梭巡援應勿使霆營將士
重喫虛驚不出十日密約山內各軍并出麾下與鮑
蔣之師搯其前山內之師拊其背內外夾攻斯爲出
奇制勝若零星抽撥微論不能得力實亦無可應命
非兵家之上策也

復鮑春霆總戎 二十九日

木子坳韓家坳一帶逆眾負山而壘每日圍擾我軍
三更始退弟以三千餘人當援賊五六萬之衝尙能
穩紮穩打想見忠肝義膽辟易萬人士卒亦皆用命

可敬可愛堅守十日山內各軍約會夾攻弟勸其前
兄捐其背可破滅此賊得鼠輩而甘心刻下總期督
勸將士戮力同心堅忍以待切勿輕於出隊約會之
後與各營奮力衝殺必得大捷也

致曾事恆 三十日

連日得多禮堂信以前敵軍情處處喫緊欲請陳德
圍四營往顧太湖東面城圍以防踞逆之衝突林翼
之意以陳德圍爲蘄州蘄水羅田黃岡緊要門戶未
可空虛因抽撥此閒李璞階一營與阿參將二營前
往助之固知丈銳意打仗而所以不敢遽請者以滌

帥今日來函有抽撥宿松四營前進小池驛助剿之
議滌帥隨身營伍覺爲太單請丈移營宿松以顧主
帥林翼五六日內謀爲夾擊之舉或可得走狗而烹
之也

致楊厚庵軍門 三十日

陳金鼇來函以韋志俊投誠歸順無有二心其部下
亦多驍勇之士且係狗逆舊屬於用兵機謀早能覷
破欲請調赴皖北以圖報效等因惟此閒於志俊恩
義未孚老兄威信遠昭人所敬憚應老兄會銜札飭
令由水道渡江先圖樅陽鎮并飭支應所先付萬金

資其行糧俟立功之候再議從優接濟祈卓裁酌定

復余會亭 三十日

除夕得二十七日書討論地勢賊情與我軍前後佈置步驟井然欣慰之至連日接據多禮堂都護暨鮑春霆總戎函以前敵情形萬分喫緊迭次請援此間實無多兵可撥非山內之軍急出而拊其背靈營被賊圍攻勢難施展祈弟台與金逸亭觀察暨月台介唐妥速會商分佈停穩先期密約多鮑尅日併力出擊萬一山外之軍未能卽應亦可挾山內全勢全力作以湯沸頂之謀惟必須一二勁旅畱守天堂或酌

派隊伍以護舊壘其鐵鎖嶺關要之處或卽以葉令
派勇扼守我軍挾釜帳前行出山之前以歸籍一路
惟是近賊之後或分或合或直入或旁抄皆在相機
而動林翼固不能遙揣惟望慎密速行耳

致曾滌帥

庚申正月初一日

山內一軍二十八日已會集天堂萬人入山崎嶇險
阻可敬可念初旬必從水吼嶺高橫嶺打出并力以
拊賊背當必成功又韋姓歸誠終須養活丈於世界
人均以天地父母之心爲心世人頗知丈之嚴正爲
第一人而林翼則謂丈爲慈悲中第一人也愚見日

久不能不養則不如及時責其立功可請會札飭令
渡江先襲樅陽再襲安慶得其一二賊必驚潰賊方
伺我於潛太之交而山中有萬人突出江上又能批
亢搗虛先傾其巢先噬其吭卽費二萬金亦可請軍
門先行札飭支應墊付林翼不辭也如以爲可卽請
速賜決定

致楊厚庵軍門

初二日

用兵先襲樅陽則實可爲異日謀安慶謀桐城之要
著以水師四營入內湖則桐城一帶轉運皆靈機勢
皆活惟須默察韋志俊之志意果否能行其力量果

否有濟耳酌之如力不能成功則酌賞之貲弟仍不
使老兄一人爲難而張都堂願爲之養豈非甚便特
恐空言耳

致莊蕙生方伯

如近日部中毛舉細故苛察爲明煩碎自亂則焦勞
一萬年而吏治之頽廢官事之欺朦更不可問矣官
吏中鄙俗卑賤不堪司牧者公總十一州之大綱亦
求專精於此乃有實濟若循分習故常之事非僅以
望於明公也

致各帥

初二日

初二日得之純觀察一函并山勢地圖一并鈔寄逸亭會亭矣圖中形勢尚煩詳查其來函或有可採或不甚妥卽如所言小池驛爲通衢靈營較爲喫緊一說之純近在十里靈營六七日日夜告急而勢不能援則軍事之言易行難已可想見其所言以金吳駐水吼嶺老營一出王家牌樓一出野人寨一節鄙意以山內萬人并力破賊爲上策若以兵分駐野人寨是將四五萬之賊一并包在腹中如能齊心齊力原是該心困項之法特恐無此本領則又有兵分力單兼恐有窮蹙橫決之虞似須再審至山內一軍固應

密約山外之軍內外夾攻然兵法總以賊來求戰爲上算我去求戰爲下算所謂致人不致於人也卽如二十二日之戰山外各軍出隊二三十里氣竭勢蹙故終爲賊所乘也不可不慎鄙意天堂山內一軍出山後且紮定以待審機審勢誘之來戰當易破也何也山外之軍隔賊壘二三十里山內之軍又隔賊壘二十餘里合計中間只隔五六十里則訂期密約亦僅祇大概情形仍靠各路之人各自力戰耳至所言速移數營於東門抽新倉之營於小池驛一節查滌帥已撥人入太湖義渠全軍速援春霆矣一切機宜

胡文忠公遺集卷之六
請多都護義渠觀察會同酌辦弟不能遙制此閒遠
隔二三百里軍機瞬息千變不可以公牘空言往返
遙制恐文到而情形又變無可適從也

復曾滌帥

初三日

初三日奉元日辰刻由事丈轉遞一函深以鮑春霆
爲念初二日亥刻得多禮堂三十日來信言二十九
日多與蔣均出隊解圍賊卽退出霆營無恙霆字左
營拔入霆中營養息多禮堂以精選營駐其舊壘似
近日已可無礙又蒙丈以數千人撥往太湖則義渠
全軍六營已可與鮑蔣作品字形爲犄角之勢天堂

之余會亭三和鋪之金逸亭已安排出山爲拊背之
勢只候天晴三五日必可如約黑石渡一軍暫且緩
調林翼在萬山中之營尙可守丈居平原衝要之地
林翼乞請以事丈二營并趙朱二營到宿松以護主
帥切求莫再調開趙國香三千人與狗抗一月希庵
乃到有保麻城之功有失桐城之大罪然其人尙老
實無他腸與李不同事丈二營切求不調太湖俟元
公希公到時惟丈之所使之林翼萬不再行牽制此
時且以養銳爲主

致金逸亭觀察 初三日

得書審連日進兵情形并三路地勢愚見右中二路尤須厚集兵力并須分枝之後會集不遠每路非四五千人不可以徇逆所在須重兵乃可屠滅似須專人速催凱右信左爲助其左路賊少似可二千人或二千餘人慎守不輕進爲是俟賊奔潰急起乘之或可多殺敗賊凱右信左二營計遲一日可以到齊吉營又須遲三四日可到水吼嶺矣天堂本善地既有會亭月台九營二成隊畱防則凱右信左吉營均可助戰以成大功兄台速卽專人迎提檄調臨陣地勢尤爲切要先一日二日安紮老營之時親同明白營

官四圍審視一次必可得賊之要領雨雪在途軍行極苦弟心感心敬不知何以報此將士也至多餽蔣唐處弟與兄處自應先期密行知會

致會事恆茂才

初三日

林翼於近日之事覺無十分把握黑石渡之軍則暫不必調也丈則必須希公元公大將到皖林翼卽決計施展斷不再爲牽制使老驥不得馳騁此是愚人一定之愚見決無他意丈一生志向總在成事又何惜遲一二月之光陰而必急於一試耶丈言初六日拔太湖則暫可不必卽令宿松不要多兵丈亦宜暫

行按轡以待希公之至此敬愛之愚忱非時俗之見也恐丈疑我敢以實告

致官揆帥

初三日

舒都護二起馬隊早入霍山近日太湖軍情靈營苦况非滌帥公忠在抱婆心救人幾難措拄此閒欲以山內二十餘營密謀夾擊之舉多都護屢次請援而未有以應不得已撥李璞階李雨蒼二營往助畧爲補苴查有新到押馬官兵并畱防武昌護衛馬隊請賜挑撥尤爲奮勇者二百名交富森保管領進割韌水預備相機撥援森保係直夫將軍所畱似可帶

隊敬乞鈞裁速酌一俟剿除賊後卽當酌量凱撤
仍以武漢爲駐防游牧之所立候示復

復多都護

初三日

霆營以三千六百人當三四萬悍賊延山逼壘日夜
攻擊之衝其苦況可危其愚忠可念左營營官鄭陽
和敢戰之將計并此次受傷至於再至於三機智則
未樸勇則真麾下以精選前營與之抽換而復撥勝
勇營精選中營并素一處想見大將婆心救人保全
大局之至計公忠碩畫欽佩何如訓軍六營移至小
池驛總宜并力不可一分再分自弱其勢惟仁兄與

義渠兄詳審地利聯絡聲威皆仗卓裁指示至於山內之軍必於近日天晴出山自當先期密約也

復鮑春霖總戎

初四凡

此次以三千人力抗數萬之賊老弟孤忠貫日月義氣薄雲霄可感可敬老弟與鄭陽和應特疏薦舉卽各營將士應均加獎也兄已函託義渠幫助老弟至山內萬人已拔營約計初五六日可到水吼嶺初十前後乃可開仗也此次援賊必期盡殺多殺殺退之後當使老弟獨領一軍獨當一面也

復吳幹臣

初四日

舒城必無多賊不滿千人惟樂兒嶺一軍太單若得
六七千人則又可以閒道謀奇功矣初二初三逸事
諸公以萬人出水吼嶺拊賊之背而令多鮑蔣唐攻
賊之胸計初十至二十日必可大破援賊若乘援賊
初破驚魂未定之時先以勁兵馬步五六千人乘舒
城賊膽乍寒之時襲取舒城得城之時密派勇丁各
持一炬將城內大小房屋米糧付之一炬片瓦不畱
則異日必無賊可守矣我軍仍卽退紮險要之地如
霍山樂兒嶺等處似是神算惜乎步兵太少未敢出
此險著馬兵則儘可謀畫湊足千二百人也又各營

之事以聽調度奉約束爲主如各將有不遵統帶之
令者密稟撤參凡營只在將之得力與否若勇丁則
無不可教之人兄須預先安排將官於胸中爲要

致唐義渠觀察并致多蔣李朱

初五日

接來函以太湖東面圍解城賊可由岔路口越馬齒
嶺至羅溪河小湖援賊可由王家學山竄羅溪河小
湖河均可包抄我軍北門後路查援賊於日內夾擊
必可力破惟須防城賊之衝突則太湖潛山蘄州之
地必有逸出之賊被其擾害如薰穴之鼠亂竄無路
如挺走之鹿急不擇陰此間催調松子關之趙國香

朱子明各營前往太湖協圍助剿遠隔四五百里非
八日不能赶到而援賊之破不出十日城賊之由岔
路口馬齒嶺竄出者亦必不出十日弟已飛告朱雲巖李
申甫兩兄請於所部抽撥四五營與李璞階阿參將
三營并力移紮寔營東門舊壘以防城賊之竄逸其
岔路口馬齒嶺等處應請兄與多都護蔣之純兄會
商設法抽調以三四營擇要扼守則太湖之賊必無
漏網也立候速籌示復

致李朱多唐蔣各營

初五日

連日細思尙不患援賊之難破而深患城賊之突出

則地方百姓必怨統兵之人我輩亦自問無顏頃於
初五日申刻函請義渠禮堂之純撥兵扼馬齒嶺岔
路口又函請申甫雲巖兩兄俟松子關二營赶到以
阿參將李璞階會合仍紮東門舊壘矣細思東門舊
壘非兵力甚厚不可穩紮且松關續調二營尙未能
到應請禮堂義渠之純速撥各二營并請申甫雲巖
撥李璞階一營同阿參將八百人先行移紮馬齒嶺
岔路口或卽在小湖河合併於要隘之處主守不主
戰或可力遏城賊耳連日雨雪在途山中雪深尺許
初九日之期恐不如約然亦在初旬中旬之交矣

復秦無譚竹厓

初五日

沐軍復進。代。以。兵。事。毫。無。進。步。愧。恨。於。心。
頭。發。盡。白。客。夏。四。撥。水。陸。萬。人。援。湘。林。翼。遂。久。滯。黃。
州。冬。令。始。調。太。湖。將。前。路。圖。剿。迎。剿。軍。情。舉。為。傳。
頓。旋。以。膽。入。移。駐。英。山。城。南。分。撥。馬。步。各。軍。扼。守。皖。
西。山。險。徐。圖。進。取。狗。逆。陳。玉。成。率。大。股。上。援。太。湖。狡。
悍。而。多。難。我。軍。大。捷。一。次。斬。馘。舉。旂。奪。其。巨。壘。而。兇。
醜。尙。熾。鮑。總。戎。小。池。驛。之。師。復。被。包。裹。心。以。為。危。此。
閒。議。以。二。十。餘。營。草。山。而。出。作。拊。背。之。勢。天。寒。大。雪。
涉。險。維。艱。而。前。敵。力。單。必。須。設。法。援。應。山。徑。轉。運。之。

費幾半於營糧鄂以楚北一隅歲入有限而養此五
六萬之眾力盡筋疲在在時虞飢潰前次奏請大邦
協餉望歲彌殷我公飢溺關懷通籌大局必不以林
翼之智小謀大力小任重忍聽庚癸之呼而少靳攤
解之惠乞賜籌十萬鉅款以濟我於危若得救全此
軍勦除援賊則東南大局皖北生靈皆感再造之恩
而重拜仁人之賜也

復余會亭丁月台

初五日

貴營以二成隊留守天堂則此閒撥來之凱右信左
吉守三營均可助戰已函告逸亭觀察速即專人迎

提計遲二三日可先後到水吼嶺也出山後安紫老
營必須親勘地勢四圍審視以得賊之要領賊館莫
延其勢雖散漫皆狡悍頭目所處之地我軍出
戰須層層布置列陣縱橫以整攻散以銳蹈瑕以後
勁而防抄襲臨陣切戒散隊得勝尤忌貪財鄙見右
中之路狗逆所在須用重兵分枝亦不可太遠其左
路賊少似可以二千餘人慎守而不輕進俟賊奔潰
急起乘之必能多殺敗賊一切佈陣機宜應與逸亭
觀察斟酌步驟聽其主裁會亭和平謹慎心賞已深
知無事鄙人曉囑月台明快激昂尙乞出以謹慎毋

稍涉大意也

復經鎮軍 初五日

唐軍初三日移營已曠與寔營會紮想已合併一處
惟精選前營欲抽出左營原壘另行紮營則左營前
此受七晝夜鎗礮之衝其堅苦屹立勢如撼山尤可
想見刻下兵力較前已厚佈置當可稍爲變通左營
地勢太逼賊壘或可不紮至仍以左營歸原似乎不
可其營帳軍裝已飭武穴轉運局趕緊解送即可專
勇迎提馬匹一事實以鞍轡未到不欲空效石牽緩
日到齊定當專足送上

復安襄陽判道毛驥雲 初六日

連奉前後三函具佩舉善去凶固圍庇民之至計感
慰何似豫州疆理無人軍政大壞任羣捻飽掠恣意
往來無過而問者竊慮日朘月削民不聊生中州將
爲逋逃淵藪患生肘腋禍在腹心襄棗毗連何時安
枕儲倉穀濬城濠修復樊城舊址勸捐集事設法藏
成備豫不虞古之善教也抑又聞之得人爲治賢於
長城克知宅俊有治人不患無治法沈令兆元孫令
寶田均已如命飭派以資委任吉令君老衰不堪稱
職撤之可也陶允中建威前營技藝嫻熟隊伍整齊

弟有調入前軍閱歷陣戰之議未審已否代行礼飭
或須撥旅換防皆在我公斟酌均州保案添入孔廣
新等三員當函告中堂求如所請惟查吳之綱系於
七年襄鄖團防案內已保知縣此次與前案本屬一
事不便再保耳黑龍集扼襄光適中之要當鄧穀各
處之衝撥營彈壓必須諄囑將弁約束官兵愛惜百
姓并乞我公隨時訪查隨時董戒使營團皆行所無
事不擾不驚戢暴安良斯爲美備州縣招解案件業
經奏請通融辦理盜賊充斥之天下搶劫重犯果能
提訊實供就地正法省卻多少葛藤有過我自任之

不必拘泥文法此閒勦辦援賊以山內山外之軍合謀夾擊旬日可成大舉惟冀將士同心竭力以烹狗於東方則幸甚矣

致李申甫主政并朱雲巖總戎

初六日

弟處原不許曾事丈輕易出隊以事丈系初經戰陣而性又極勇也弟之敬愛滌丈公所深知故於事丈處備極私忱昨批令不準到太湖而竟拔營惟有力求我公以善處加意裁抑斷斷不可信其高興之言移紮東門亦不可使之當賊衝要切囑切囑事丈好動而閑厯少切求禁止其躁意如欲云云則請以滌

丈及林翼之令止之

致張仲遠觀察

初七日

元日來教敬悉一切公以微罪行公之福也至米石
應設法辦理來書言部議累及於鄙人此腐鼠也弟
志殆如舞陽侯所謂厄酒安足辭者至如塵世得失
早已看破萬不致鄙俗如是公勿言及此爲囑賊日
多而兵日鈍只要山內一軍及時得手耳

復蔣之純觀察

初七日

訓營會紫小池驛軍情自穩山內各軍想不出四五
日必有約會夾擊之信惟賊壘有險夷制賊自有難

易分兵亦有輕重一切佈置均祈兄與多都護義渠
觀察春霖總戎熟審地勢賊情妥謀分擊之舉或伺
賊之缺處蹈瑕而入或挈賊之重處并力而前皆在
相機斟酌惟臨陣切戒散隊切戒貪財得勝之時尤
宜整飭隊伍多求痛殺此次山內各軍并出而拊其
背兄與多鮑唐軍角其前必是勝著然亦必須各白
穩打立於敬慎不敗之地而以忠勇出之屠狗必矣

復多都護

初七日

訓營與霆營會紮軍聲頗壯軍情亦較穩蔣營距賊
七八里出隊亦覺便捷惟仁兄馳驅策應備極賢勞

山內各軍初八九可到齊想必有約會夾擊之信尙
祈卓裁速審地勢賊情與之純義渠兄春霆弟安籌
佈置相賊壘之險夷爲分兵之輕重或伺瑕而蹈其
隙或以銳師并力而攻勦敵或以誘戰而設伏兵運用
機宜皆賴老謀勝算分行佈置左拂右縈切戒貪財
切戒散隊不可不分枝亦忌太分則力單耳

致金逸亭余會亭丁月台

初八日

唐營新到小挫蓋總是好撲壘而不防包抄也打此
賊總在必勝不在急戰吳楚安危東南安危全恃山
內一軍舍此并無後繼亦無後勁不可不慎也有打

仗之營總須有第一等好兵不打仗之營可十日不戰不可一戰不勝總須謀而兼勇乃可勝耳

致多都護

初九日

得初七日書而初六日訓營失壘及如何情形并未提及查訓營初四日拔營遲遲未進到後各營派隊派夫代爲紮營壘成四尺竟爲賊所破殊失所望弟意賊從西山南路包出訓營似宜移紮靈營之左後中三營之後約二三里斷賊從山徑包抄之路則靈營與楊朝林各營當可不致斷餉地勢軍情弟處難於遙揣祈安速籌商訓營敗後其兵將尙能復振以

速自穩固否山中之軍初九日必到齊尊處與之純
專人密約可也

復唐義渠觀察

初九日

初六之役營壘未定不宜出隊零星接仗不能以殺
賊而適以挫我師殊爲不值且賊以多壘誤我於前
而以悍賊襲我於後各軍前犯此忌而不之防專事
破壘而不爲之後亦毋乃失計矣靈營餉道仍然梗
塞心以爲危或山內各軍速出高橫嶺并力破賊尙
可救也自公退後鮑營被圍黃泥港無賊而附近靈
營及銀珠塔乃有賊麾下宜急自整厲奮勇前驅救

人於危轉時爲功是所盼禱

致鮑總戎

初十日

密啟者如力實不能支尙欲全軍以待大舉救得人
才不怕賊子不死於老弟之手此事暫不可宣萬一
到緊急無可如何之時則新倉荆橋均是退步有過
兄一人任之兄爲管理軍事之人以保全軍旅爲主
斷不忍誘過於人也山內之軍初九可齊不知密約
何日耳

致余會亭

丁月台

初十日

連日以鮑軍孤懸爲慮幾乎寢食均廢尊處總宜雄

據山巔必高處立乃能闊處行必眼高於頂乃能力
大於身滌帥言狗已冥誅其然耶其不然耶總要審
已不必問人

致莊蕙生方伯

初十日

連旬軍事孔棘思慮多則精力短肝火熾盛今日張
長泰來拜年與劉縉來此均怒色斥罵幸飭省中新
到者亦勿來此新到捐班此是一科第無決絕不用
之理然循例委署以學製使人則心以爲危也漸水
昔年之漕大戶有侵漁之利小戶受浮勒之害民病
而官亦病有雉經於巴河兌次者矣其黠桀如梅小

素者則專意勾致劣紳狼狽朋比紳樂黠吏之分肥
官漁窮民之大利此已往之大害也自七年秋改章
以後第時以手諭諭劉令以不侮鰥寡不畏強禦為
戒會手懸之該縣漕局以不侮鰥寡不畏強禦仲山
甫是也海縣寡而畏強禦州縣之敗漕是也云云
至再至三並令從重懲辦所以救州縣而董戒漕政
乃能辦動並令從重懲辦所以救州縣而董戒漕政
者無所不至不料劉令今年預聞卸任頓減每石二
百五十文以一二月之期將全漕收兌二萬四千餘
石夫減定漕章三次入 奏其錢數已懸之國門書
之 天府不可增減增者應問罪減者亦應劾官
否則劣生刁戶聞風而起漕政日壞州縣亦疲事必

不可爲矣尊意欲僅議過似嫌太輕弟能奏定數目則虛減亦應實奏以入彈章也至易令之欲分肥則又卑鄙之至人心至此吏治何由而飭方伯當以正人心厚風俗爲首務毋謙讓未皇也渭春信來初十日可到任到京不謁朝貴尙有正色力朝之初志擴而充之堅守不失其庶幾乎此信乞公閱爲荷

復彭雪琴方伯 十一日

念自墨經治兵載驚改歲軍事毫無進步鄙人一身不足惜獨惜前途將士雨雪過征金余所部萬人日內始由天堂出駐高橫嶺而霆營近逼賊壘幾困長

圍雖屹立如撼山而餉道尙多梗阻其堅苦情狀尤耿耿不能去心前敵之危多蔣各軍皆形睽勢隔不能救人如救火唐軍自新倉移小池驛初六日三營挫退不能成營蓋與客臘二十二日之戰皆誤於賊壘在前而不計村館之悍賊四溢橫出而襲其後此心焦灼我勞如何刻下所恃高橫嶺之二十餘營挾全力全勢拊賊之背以解靈營之圍而撥蔣道龍家涼亭各營漸移而西進附靈營聯絡聲勢以唐營填紮蔣營舊壘再接再厲或可大振軍威相期滅此朝食也兄隨身只三營霍山則有吳幹臣五營與舒都

護馬隊現駐樂兒嶺軍情瞬息尙待隨機調度耳

復鮑春霆 十一日

自聞初六日府軍挫退無刻不懷念弟營每得弟一函展視再三而私心稍慰如旌懸在空風過畧定十一日接初十日惠翰并地圖未及近日餉道之事想不過幫運稍難而堅忍情形自是屹如山立天堂萬人初八九等日已出駐高橫嶺可以牽制賊情來書謂賊意注重二郎河慮及太湖後路并楚邊之陳德園鄙見我軍全勢并力於前賊雖狡悍斷不敢舍此上犯萬一賊勢分趨則我軍猶可相機剿辦耳本日

有致唐蔣兩兄函欲以蔣營漸移而西以唐營入駐蔣營舊壘節節抽換即可與弟營附紮聯聲威庶餉道無虞軍心愈加雄壯而前後夾擊之議可以一戰成功左營仍復原壘無棚帳即可專勇前催鎗礮對擊山坳賊不敢近深以爲慰此後約會出隊切勿專顧賊壘酣戰而前須重防村館悍賊沿山四出我能以抄後見功則賊無所施其技矣

致曾滌帥

初十日亥刻擬請以趙克彰朱希廣楊得武移駐靈營小池驛之後以厚靈營之力鄙人之愚覺劉珣林

已出太湖在銀珠塔一帶助戰卽圍住東門亦無大
益也所議何如敬乞鈞度

致金逸亭余會亭丁月台 十二日

連日兢兢急望尊處先占高橫嶺初八初九初十三
次專函商之逸亭兄以居井底爲戒以先踞山巔爲
勝并切囑高橫嶺不可讓賊占之日昨得月台兄書
言所駐之處私心總覺其稍低又月台兄以地圖并
書來示言紮營之地名曰燕窩是必外坳中坳乃爲
窩形此恐犯兵家之忌十一日未刻又得逸亭初八
夜復書指陳高橫嶺白楊嶺茅嶺之要如此則虜在

目中必勝無疑林翼可私浮三大白矣預賀預賀蔣
信言賊上竄謠言也蔣近在鮑營十里咫尺不救而
能救大局乎山中一軍萬人既得地勢則惟有審慎
賊情爲要愈老愈堅湘軍之本領也切莫改樣

復曾滌帥 十二日

昨日尙不以蔣說爲然而深以鮑軍爲愈夜間得唐
鮑來信餉道尙通卽夜躍起以朱希廣趙克彰至羅
溪河并益以楊得武矣均於十四十五日可到防舒
公不甚明白而卻樸勇林翼若到羅溪河駐紮則距
太湖高橫嶺均只數十里惟此閒是天堂霍山轉運

之要道借蘭溪水次牌運以省夫力而日役英霍民夫每名日給八十文限一日四十里百姓踴躍萬人同命大營文案轉運聽差隨員應仍駐紮此而自帶行帳并酌帶親兵數百人前往羅溪河實爲要著林翼現只二營以大半畱此以數百人隨行若畱駐界牌石又分兵力且羅溪河本無領將不可必得又思其次莫如林翼矣

致金逸亭觀察 十二日

孔子登東山而小魯登大山而小天下湘軍登山頂則小狗何足道哉大約近五日必一鼓成功矣弟近

日又撥趙國香朱子明楊凱臣到羅溪河因滌帥已撥二千五百人在彼駐紮再加三營可以無憂矣尊處亦不可分顧太多太多則氣散心散尊處以戰爲主他人疑惑之詞不必顧也

致余參戎 十二日

鮑營甚苦太湖羅溪河等處暫不必分心軍事紛心則氣不專力不足見屋卽燒燒一屋則賞一次無論是民居是賊館能募團局散人專管燒屋則不過三五日賊無駐足之地費銀數千我亦不惜夜間派團丁專以火燒屋擾賊夜不能安卽日不能戰官軍打

仗之時亦可派人先焚賊居成大事在救大局莫姑
息以藏奸異日皖境安居賞錢與民亦可造屋凡大
屋尤須密燒急謀大捷以救春霆

復鮑總戎

十三日

十三日得十二日書具諭一切初十夜三更出隊擊
退唐營舊壘之賊想見調度有方撫循得法士卒忠
義感憤之氣愈苦愈堅鄙人何德不知所報願弟代
致私忱爲幸兄已備米一千石錢二千串作賞交武
穴吉水溝局員矣多都護十三移營之說已實行之
否蔣營附紮想必遲遲其來襄陽鞍轡日望一日兄

殊急不能待昨遣弁送馬六匹計日可以到營鞍轡各件尙需緩日軒送也

復浙撫羅澹村中丞

十五日

得賜書敬承所訓金陵以長濠困賊張三面之網而江面不知措意江北尤宜賊之掉尾游行也視乎異域將自困矣烏能困人蘇杭腹地之防誠不得不早爲之備天下強兵在將上將之道嚴明果斷以浩氣舉事一片純誠其次者剛而無虛樸而不欺好勇而能知大義要未可誤於矜憍虛浮之輩使得以巧飾取容真意不存則成敗利鈍之閒顧忌太多而趨避

愈熟必至敗乃公事陳都司英不勝帶勇之任接顯
門中丞初七日來信已就近札止虛擲千金尙無害
也李鎮廷欽弟亦素不相識滌帥甚不以爲然昨於
函中示意另抄呈閱愛我如公不敢不告公之待我
至誠弟有所聞卽應盡情上陳若有匿情恐負盛德
譬之葵藿之傾葑菲之採惟祈鑒察而斟酌之韋志
俊獻城歸順復陷於同室之戈張小浦京堂有意養
成此軍然必須棄多就少汰弱畱強與之整頓營規
責以立功自效或可稍資得力大抵將官流病一失
之驕一失之怯驕尙可制怯不可爲要皆矜憍虛浮

之氣有以中之故決擇不可不慎也此閒山內萬人
於初十一兩日分抵潛山之仰天庵高橫嶺兩處
紮營十一日該逆緣崖而上近撲我軍金逸亭觀察
堅忍持之奮迅出之遂獲大捷余參將復橫出抄擊
并力夾攻破其巨壘斬馘三千小池靈營被賊三面
圍攻兩旬有餘日唐多蔣各軍皆氣沮志怯形隔勢
阻不能救得此一戰節節追剿可以轉危爲安此出
奇制勝之師亦非霆營之堅苦不能久持與我以破
賊之機或者屠狗可期割肉一癢而薦之李忠武之
靈并稍釋林翼之負罪從軍之恨也至謀金陵者必

應注意江面及江北可請函告根雲大督兩亭節使
弟等分隔勢阻難於會面也左公已定正月初十日
挈將少雲入都駱公強畱十餘日以了南岸之事次
青處會以書來商出處已請其奉攀輿入三江矣

復荊州府唐蔭雲 十五日

得手書具諗賢太守爲 國爲民歸本於認真二字
時事之變誤於不真視 朝廷政教爲具文以致曠
官失職與民瘼絕不相關遂使呼號無告構此鞠囚
而泄泄沓沓者流仍復養癰貽患諱疾忌醫上下相
蒙不思實力補救亂之又生君子信讒亂之既生君

子信盜能認真則悉心講求聰明智慧因之而出情
神強幹亦以不衰荆楚之閒庶其有亨欣慰何如

胡文忠公遺集卷七十

長沙鄭敦謹

湘鄉曾國荃

編輯

致嚴涇春廉訪

庚申正月十五日

公遠行七千里未交朝貴可謂胸次獨高矣守之充之無限事業之始基也丹初至爲可寶恨相見之晚必強留數月可益吾心公言得一經明行修之士願聞其名公言以定楚勿圖皖爲計不圖皖不能守楚兵事如學生功課不進則退不戰則并不能守敬姜之言曰勞則思逸則淫設以六萬人頓兵境上無論

古今無此辦法且久逸則筋脈皆弛心膽亦怯不僅
難戰亦必難守公其再思弟不自出名報仗已三年
矣視人世之功名富貴殆如糞土非計功近名之人
也此種苦心惟公或能鑒之近月戰事已按日鈔寄
香雪文若當能轉致六萬兵馬統將難得然亦無賊
到而不謀畫戰事之理設曰吾無統將請賊莫求戰
恐無此善體人情之賊矣如天憐我愚一月打破則
吾之悲壯憂憤可稍釋一二公且精吏事民事以善
其後至囑至囑

致余會亭 十六日

十一日之戰可謂忠勇弟與湘營人處湘營中好學處須學之兄望弟台開湖北風氣者也戰守機宜不可紛心紛心則氣不專神不一所望逸亭與弟審機審勢妥爲之破大股之賊須蹈其瑕從賊之虛怯處入手則賊易奪大功易成

致金觀察 十六日

銀硃塔之賊已遁若循紅土山據高而下擊之可速破也惟潛山入天堂之路乃全軍安危所系餉道所關應請兄速會會亭兄循山移勒而請月台兄移桂禮三營駐賀家嶺或水吼嶺弟今日預札尙是爲天

堂近日有警起見明日另札飭知卽請月台兄移駐
賀家嶺也如嫌兵少或撥昌營一營或酌撥抽撥凱
右信左一二營均可明日似可曠或是破賊之機乎
滌帥以七營出新倉以助鮑亦於十六日可戰也

致多都護 十六日

全行換守之說知爲仁兄愧厲靈營之語無此不近
人情之事靈營迫切求援急不擇言前敵之危惟仁
兄之所目擊亦時以糧道不通爲慮精選勝勇各營
繼進而情形漸穩山內各軍并出已於十一日大捷
破賊後面巨壘計日來山內日有戰事惟十二十三

十五等日或未大戰山外亦必有並舉夾擊之事其
前路軍情一切悉聽仁兄主持鄙意不宜零星分撥
似應并力夾擊爲妙如以訓營并湘營以尊營并靈
營擇賊所不防之處并力一戰如破竹然於根本節
要批之則勢鈍於竹尖竹尾批之則勢利賊從東來
西面必輕西面破東面自懈矣兵法攻瑕不可不思

· 復李璞階續燾 十六日

羅溪河地勢扼要可遏城賊之衝并防小池驛援賊
竄繞彌陀寺襲我軍後路依山爲營兩頭兼顧自是
穩著金余兩軍大捷再得多鮑前敵之師並舉夾擊

援賊不難卽破惟挺走之鹿急不擇陰援賊破而城
賊亦慮其狂奔前後探防隨機截剿同心戮力師克
在和丕勝盼禱至所諭太湖東西尙須防守應聽朱
總戎李主政主持調度也

復皖撫翁祖庚同書

十七日

得手諭敬領種切皖事千頭萬緒公以尺幅振領提
綱大畧可睹大抵爲政之本在於得人吏治兵畧皆
可循緒而理來示獎目後進如歐冶相劍能名其種
猗頓辦玉不失其情想見延攬之殷必能吐哺走迎
國士惟是將材難得上駟之選未易猝求但得樸勇

之士相與講明大義不爲虛憍之氣夸大之詞所中
傷而緩急卽云足恃吏治不修講應酬講例案拘文
牽義與民瘼切不相關此輩宜束之高閣必得厚重
少文者實心爲治救此瘡痍蓋皆不容以資格限也
午帥不受張滌之計其高著眼孔慮患甚深不欲狃
於目前論功旦夕與我公心心相印辦事無掣肘之
虞克敵有致果之氣皖事其庶有豸乎此閒山內萬
人十一日兩路破賊於仰天庵高橫嶺一帶破其巨
壘斬馘三千十三日又復出隊迎擊而銀硃塔一帶
之賊皆棄壘遁逃紛竄潛城小池驛各處鮑春霆總

我以三千餘人當賊三面圍逼兩旬攻擊之衝新正
十二十三等日始得多都護撥營前助糧道漸通兵
力亦漸厚再得前敵各軍並舉夾擊或者屠狗可期
惟春霆之義氣孤忠堅忍耐久與我以破賊之機惟
滌帥之婆心救人分防助剿堅我以破賊之力壯猷
遠畧弟何有焉來書借詞溢美無任慚愧

致各帥 十七日

十三日山內各軍進戰而銀硃塔一帶之賊已棄壘
遁走山內各軍近日酌量移營進剿似當循紅土嶺
一帶依山而壘步步逼緊也如賊勢另有變動則相

機而行弟亦不能遙揣惟是與四眼狗交戰有進戰之營必須畱營作守假如以十營作前茅爲戰兵卽當畱五營作後勁爲守兵其畱後之兵尤須勁旅成功一也不可爭目前之微功而誤大局以此類推可也查去年賊圍李若珠本已數載不能破入賊忽發一枝兵勇繞入揚州城邊揚州告急李若珠分兵前往而賊又急攻李若珠之壘遂致被圍又查近年在鄂總是分枝作小包大包之勢以狡計與官軍爲難若堂堂正正賊亦不能戰也弟意小池等處兵力已厚其出隊之日總須畱一軍或七營按兵不戰以杜

後患而虞抄襲又山內一軍進剿尤須留勁旅五營以顧天堂根本并駐守賀家嶺水吼嶺等處以伐奸謀切囑至囑萬勿輕心大意

復鮑春霆鎮軍十八師

近日金余各軍循紅土山一帶步步逼緊爲居高臨下之勢想與前敵犄角聲息愈近惟吾弟審度地勢賊情並舉夾擊必須謀定下手之法自尾批根勢如破竹節節埽下自無偏趨旁繞之虞仍與各軍會商妥辦平心靜氣協力同仇庶幾戰守兼資更番迭進而援賊可期速破也此後出隊獲勝切戒搶賊棚帳

包祇什物每謂臨陣奪獲并爭取首級實增累贅只顧向前殺賊哨官營官督隊親見之事各憑公道各問天良論殺賊之多寡爲戰功之高下至於貪搶財物尤爲散隊亂陣犯兵家之大忌墮狡賊之奸謀更宜嚴切曉諭嚴加厲禁至要至囑

復唐義渠觀察 二十日

所論地勢賊情必從太湖西面埽下先山賊而後壘賊步步經營此見極是旣與多鮑蔣諸兄謀定後戰須扼定此意一步不可搖動鄙見前敵一軍必須緊傍營壘勿宜遠出俟西面山賊壘賊旣動然後奮力

衝突截腰擊尾勇心愈壯賊愈措手不及更是穩著
更是勝機至於各營各自爲後馬隊分路包抄支支
聯絡自然無懈可擊金余約會聲息相通畱鏌走之
路尤宜備得力之軍以爲尾追痛殺之計皆在隨機
應變層出不窮此閒不能遙制也

致丁月台 二十二日

十九之挫不可尤人只應自立其過在山外失約而
亦自失地步也千言萬語貴於審機審勢占山占險
尤須與湘軍聯成一氣乃不單薄賊本乘隙而始出
戰賊知彼竭我盈之機而官軍則始患其輕終無力

量亦可嘅也須煩實力董戒小挫正以成人之美不可灰心

致曾滌帥 二十三日

羅溪河是山僻凌蔭庭阿達春無言而李續燾言之固不信也似仍屬無妨賊之竄路固僅有此路可走舒公馬隊二百已到龍灣小湖河太湖河一帶亦備一格讀所寄逸亭書示以從羅山衝下手莫從廣福寨下手又命其日高三四丈候山外各軍至羅山衝口外乃出而應之均腳踏實地之至計即千古用兵之奇謀感佩無既新倉出隊太遠然移營亦殊不易

如數日後竟不得手朱雲巖七營可否回駐太湖或
改由羅溪河山僻入馬齒嶺此地山僻尤險峭未經
勘視姑存一說而未敢信也往返須十日一動不如
一靜仍以持重不變動爲穩尙乞鈞度

復多都護 二十五日

二十四日四更得二十三日亥刻復書知擬於二十
四日移蔣軍於霆營西面甚善來示賊匪踞羅山衝
倚山隱谷自應候其出山而擊之鄙意山外地勢自
低登高其勢難山內地勢居高臨下其勢易已札商
金守余將或擇地移至陳家嶺等處俯瞰羅山衝一

帶或可乘便因利從西面迎頭下擊不可先攻廣福
寨斷其敗路或有合於圍師必闕之旨無世俗關門
殺賊之虞昨已函商金逸亭矣又賊勢專重太湖換
賊入城運米入城此其志決不輕棄滌卽所撥七營
六成隊弟意畱於新倉不能得勢不如撥回太湖可
以重上游之防而戒備不虞或會同逸亭從山中下
擊則較之從新倉平地仰望山谷者形勢不同或以
重兵駐太湖預杜奸謀使賊不復萌陳德園二郎河
之妄念均屬軍情之要乞兄酌之其督標二營趙朱
及李生建威等營則仍應久畱以重餉道弟因賊勢

西趨預擬如此滌帥之心非擁兵自衛之人此固兄所親見而深知者矣

致振營凌參軍 二十五日

團練之程不遵號令查團練決不能堅忍苦戰見虜無親勝不相讓敗不相救矣此人不爲尊營用兒虎不用此人正是各營之福任其自行自止自打一踏不必顧他馬隊宜取遠勢以善進善退爲上不宜駐羅溪河山僻也賊如來犯必是試以小股堅忍自持姑示以弱待其喫飽壘中鎗子日暮賊歸時酌量擊則擊之馬隊須在平坦處布隊

致多都護二十六日

二十三、四等口之書均已奉到大計。總須從上打下，從西打下。兵家之事，賊伏不動，則我軍不宜急戰。來函謂賊伏山谷，不出欲攻壘，賊未易得手。欲攻山賊，馬隊難以施展，步隊未能一律，誠爲至計。只可從容持重，先立不敗之地，爲要。正二月之內，弟決不催促。可請從容籌畫，以期一鼓盪平山內一軍，尙須移營金逸亭，信鈔上并望傳之各營爲要。

致丁月台二十六日

弟欲兄駐天堂異日，以梁蕭并兄與吳之五千人出

七成隊十人挾一帳房并輪流專馬探狗之欲遁突
出擒之并有馬隊四百人同兄前往又可調介唐團
練助威此千古用奇之妙也須預存於胸中探審路
徑先發則賊已知後發則賊已過此中機宜惟絕世
聰明人乃能知之乃能審之此計只可與湘帆密言
之何如賊不欲戰必無急戰之理急戰則必敗可堅
忍以待之三月成功尙不遲也

復金逸亭二十七日

二十五日山外大捷仍是待賊出隊先敗後勝聞殺
賊實逾三千實足爲慰山一中一軍不難於出隊而難

於收隊賊必待午後始以大股迭進非忍以待之并
預蓄餘力以待之不可乞以此意密商會亭也弟意
總須候賊求戰乃可出隊山內山外約戰則須實見
山外各軍得機得勢有可赴約之實據乃能乘之否
則不如按兵以待釁也賊不能再支一月一月則糧
竭而賊自潰弟意總以持重爲主弟又擬調樂兒嶺
一軍入天堂從遠處設三伏截其歸路何如乞兄酌
之示之

致曾滌帥二十七日

朱雲巖捷書到雲巖之心術可敬不爭一時之功不

掩人之美善不虛報賊匪怯敗之詞均可敬也
二十六二十七二十八塘捲移營總是勝者惟乞
再行函致金余多蔣唐鮑總須堅忍以逸待勞以主
制客以靜馭動以整擊散羅溪河之兵不移爲妥舒
六已調進小湖河矣吳幹臣到天堂亦可能預審地
勢從遠處設三伏以待敗賊如野人寨桂水畝之類
乃妙否則不如不動霍山本是山外閒著到天堂以
助丁月台未始非奇兵也乞丈訓正至調入南路則
可不必此次若能破賊當以介唐居首座設無介唐
則士氣不揚呼應不靈安敢以孤軍入天堂哉甚矣

吏治之與軍事相表裏矣林翼近月肝氣決裂見兵將尙和見吏則怒不可解有痛詈不堪者自知太過而怒不可遏大約是病矣江南得九洲歆動一切東南成功尙早我輩自行其志不睬他人

致周志圃汪梅村蔣文若

論建策言書院

啟者先光祿公正學純行矜式鄉里慈顏見背不聞庭訓者二十年矣八年因母喪歸里展視松楸見邱隴有水啗痕悲慟自責負罪萬狀十數年荷戈於外省墓缺如致先人體魄不安急思改得吉卜奈甫滿百日而三河變起朝廷有從軍之命義不得顧其

私逾年始倩堪輿家物色一二佳壤已請黃大令褚
廣文前往覆勘安定後另遷先光祿幽宮伏念先光
祿主持正學身體力行爲邑人士所欽仰擬行塋高
敞於地旁建立祠堂外閒架疊爲書院體勢購羣書
實中卽以公之邑人士四庫全書目錄經史子集體
用兼資此外名公記載有關世道之文爲目所未備
爲進德修業之士所必不可少者措千金售之請梅
老志圃兄查取書目及刻本何者爲精何者爲劣均
一一開註並懇文若以貴棗屬積學之士前往蘇杭
購辦或兌寄浙江請少村世兄代往購之林翼終鮮

兄弟嗣子尙髫髻自視已覺早衰因念益陽山水
清奇潛德之士懷抱奇節甘心窮餓遯世而不悔者
代不乏人鄉里著述見聞甚隘搜羅坊間俗本不足
以資考據爲研精耽道之助先光祿公家貧植學多
以借緘游目旁搜遠覽博通天人每課徒取士必講
求器識上下古今之變效法先儒毋徒視誦讀爲資
文藝獵科名具林翼德薄能鮮勿克負荷願與吾鄉
父老率其子弟共守此志孜孜勵於實學振起士風
弗致守缺抱殘恨遺經之不廣是則林翼之欲以祠
堂爲書院而推行先光祿正學之傳意也諸兄以爲

何如

致曾滌帥 二十八日

太湖羅山衝捷音二十七日初更已至英山鑿動稍
慰惟求指訓一切機宜及某將應添某將應減之處
金余似應循天堂以謀桐也一切求縷細指示義渠
到淮北恐非所願而志在爲吏吾黨無人做實官者
各從其志何如蔣似不能兵須酌之春霆錚錚蜀亂
已甚假歸恐不能不爲所羈絆不如以貲迎其母妻
養於蘄黃也朱雲巖可循石牌以先謀樅陽否

復金逸亭 二十八日

山外正兵可攻潛山山內可駐野人寨潛山若得山
外駐桐城之前山內駐舒桐之交另以一枝出樅陽
得樅陽則安慶不攻自破矣大致如此未盡機宜明
日再復迅起赴之可乘其驚魂而多得一二城也

致丁月台 二十九日

得書知賊在大屋以奇兵二百取狗首來正是儒者
精義入神之事奈何已思其計而忽以招議自止弟
意中之計尙未能行不過三箇月狗技又壯狗膽又
雄楚其旰食矣又終是天下之禍根弟苦心焦思六
七年矣竟未能屠滅此賊負疚甚多天下不如意事

常八九其斯時之謂乎弟思平定吳楚不過家常茶飯無功可言貽患吳楚則是我一人之罪無過可諉總之謀吳卽以謀楚不僅保鄂也湘沅鼎澧亦終以吳爲命忠於公者亦忠於私願公勉之事定之後長揖而去一絲不挂此吾輩之志亦吾輩之分也

致羅少村二十九日

得書披讀一是見所論浙中吏治兵防均覺弊政太多未易整理總之有治人不患無治法以尊大人之誠心正氣登高而呼吐哺握髮走迎國士必有徐起而應之者世兄雖屬嫌疑之際存心敬慎先去其近

前壅蔽之事轉移於無形則賢路開而可其得指臂
之助矣左丈爲天下才是以浩氣舉事者時賢中不
數覲現以憂讒引退正月初間卽擬挈陶少雲入都
籲門挽留十日近不知作何行止然斷不能再安其
位恐亦未易羅致李次青正人也任事一片血誠筆
墨亦敏捷清挺無俗塵軍事參謀可得一當特未可
專以治兵耳此閒將材亦不多分兵應客未敢以下
驕充選尙待斟酌浙中五六萬人不能辦賊動說兵
單強兵在將卽此其明驗矣竊謂盜賊充斥之天下
總在任事者有知人之明兩浙富饒山海自然之利

經而理之足以養成勁旅而皆非得人不能世兄惟
審慎於賢豪之間以爲佐理此外固非所得預也

致多都護 三十日

沿山克復敬以爲慰四路之兵應分作三路安慶桐
城舒城各爲一路滌帥任安慶公任桐城李希庵任
舒城公數月勤勞忠盡萬狀惟時大計應由青草壩
速行進兵則桐城之氣易奪遲則賊亦稍稍布置矣
應請飭春霆之純一同速進其金余二軍應由桐城
之後下手或居桐舒之交或先會取桐城再謀舒城
亦須臨時酌商各營強弱公可明言之兄欲添人弟

可戡兵以伸兄滅賊之志凡勇須自招募者乃可戰
非如兵之可以派官統帶者也兄曾言願得馬步一
萬人可以橫行天下弟意兄領馬步萬人必成大功
希庵萬人是羅李之所畱貽弟不能撤滌帥萬人是
容兵亦不可撤弟所募之人則可有可無不關輕重
也鮑春霆一軍如兄不取則可交滌帥差委滌帥欲
之而不肯明言也

復潛山縣葉介唐 二月初一日

得書敬悉營團協力防剿兼施深以爲慰此次援賊
之破非刺天堂腹地不能并力合謀亦非得東道主

人不敢以孤軍深入得人得地惟兄之苦心孤誼助
我成功潛境士民之拜賜尤其顯焉者也前敵各軍
一切採辦接濟之處仍乞卓裁加意至棠封蹂躪之
餘撫綏招致部署從新仗賢宰整頓二三月可以謝
潛民矣

復多都護 初一日

來書所論保舉一節精切不刊 國家名器不可濫
與慎重出之而後軍心思奮可與圖後效而速成功
况隨摺請獎不宜人數太多此見極是爲 國捐軀
之士其忠義不可磨滅卽典優加禮亦宜之潛城所

必成大功也

復甯撫羅澹村

初四日

大破援賊二十六日掃除小池驛賊壘賊館並收復

太湖城尾追至潛山二十八日連戰克復潛山城狗
之初志欲困我霆軍以百十座之壘層層固逼相持
一月計無所逞旋欲繞入太湖分竄鄂疆其謀不謂
不狡鄂以四路之師歸并一路前後夾攻作大圍包
剿之勢斬擒悍目甚多殺斃不下二萬人奪獲三千
觔洋礮並大小火鎗數千賊糧萬石刻下金余之軍
迫入桐城固不忘困獸之猶鬪或可免爲獠犬之所
噬也所可慮者師勞涉遠餉運多艱鄂中竭盡棉力
尙不供三萬人之支放與一切轉輸公所素知此次
水陸馬步六萬人得半而止蜀事如斯卓如前輩已

明示以不能協濟秦晉 奏定之數自滌帥入黃州
以後僅得秦晉各一萬兩廩餼則颺士飽則嬉此中
機宜公自鑒之前 奏未得 俞允何能以私廢
公弟亦知公之苦心矣

復官揆帥 初八日

奉書敬悉一切太湖大戰之摺潛山克復之摺次第
拜進甚慰此次血戰似系軍興以來未有之奇他省
兵將似難如此堅強果毅尊諭節節進擊步步爲營
通糧路設後援均切要之論禮堂言此次賊皆精銳
并非盡以脅從湊數兩月之久賊氣傷十分之七兵

氣亦傷十分之三禮堂此言誠爲知兵之人應準其稍稍休息也應商事宜開列於後一大得二城本應酌賞惟糧臺支絀每人百文合計已逾五萬串恐無此力量且有強有弱應撤應留殊難畫一鄙意功勞以多鮑爲最大多派總領可否請以大銜掣賤名作書致送二千金以爲禮堂添補零用其次如鮑超請假養息二月俟其到鄂由中堂面諭糧臺給銀一千以慰其將母之心此外如營官之奮勇帶傷又復褻傷力戰始終其事者林翼已飭隨營營務酌送六十金或百金不等此議何如一分兵似須三路一桐城

一安慶一舒桐之交而後路北路仍須畱防非私於
楚楚警則前敵皆危也一商量定局尙須十餘日布
置則在多假滿希庵到營之後一義渠三千四百人
已撤義渠有功於襄陽求中堂給以養老之地一二
年後便當歸田矣如以爲可卽祈示下以便札行到
任一禮堂久有獨統萬人誓必滅賊之志弟已許之
矣除再咨復添三百人外應以弟營之最强者與督
標新營之至强者添附禮堂禮堂之爲人能謀能斷
可當一路與招散營而無所統一臨事倉皇不如認
準二三統將卽於統將中厚集其力必可成功與其

撥數營之鎮道強之使統而心終不協不如以五百人散營歸於能統之人而羣策羣力仍稟承於一人必可成功擬撥定後再行咨明也

禮堂才高意思然有膽有畧萬不能

不用此苦心也

一唐義渠已撤幸希庵已來其才識威望能

當大敵應以難事重地委之合湘撫并蔣八營總在萬餘人之數一蕭張不來滌帥少將擬選一將以助之專顧安慶安慶糧足非桐城賊破安慶之賊不走也一李續燾一營離開希迪二公頗改模樣未可撥歸禮堂其趙克彰朱希廣楊得武李雲麟等及梁洪勝陶茂林等均驍勇可用歸之禮堂必成大功也

蕭濬川以入夔府重慶爲是不可入都勻已請條帥
札行第亦會咨會札矣一弟營只可在蘄州太湖之
交或潛山之地尙未布置定局一兵勇不過能裁二
三千人賊勢地勢非如許兵力不能成功且須酌留
餘力以備不虞臨事呼助皆不能戰之人而又虛糜
軍餉湖南去冬撤兵太驟而終不能省錢是其明證
大約月餉今年必虧二三月之多夏閒遞欠秋冬乃
可全清以弟料之如布置得宜不過夏秋儘有佳境

致汪梅村

初九日

祠堂爲書院兼欲藏有用之書以迪後學弟意私之

一姓不如公之庠序之爲公溥可久大也祠堂祭祀
不過須田五十四畝胡氏得與之管書籍備束脩
須佃租三百石豐歉長短可得錢三百串世衰道微
經明行修之師儒得三百穀不豐不儉乃可教其子
弟若太豐厚則有託津要權貴挾市道以居此位者
矣非閭修之所向也大約近年書院多華士少隱學
皆官長之道也膏火須設額多不能滿二十人者不
過十餘石或二十石須租四百石加以管理之費另
籌薪水及修葺牆屋啟閉戶庭檢料蠟燭等費約需
百餘石又加以祭祀之費通計不啻千石

亦隳具規模矣資水之田畝收穀五石

鄉人以六畝三分爲一石

每石可得穀三十石佃者交租可得穀二十石或得穀十石

以長短肥磽截補大

抵銀百兩必得田六畝歲租可十石林翼八年歸里

查閱田疇粗足衣食不必取以自肥處此時勢而欲

自肥以供奉盜賊卽不然而特以貽子孫酒色之資

亦太愚矣是此事無論升沈禍福仕止久速而志在

必行循髮已衰勉行之猶恐不及禮經不講久矣

當以紫陽涑水爲師三禮之學百世不惑講學亦必

以復禮爲主公言學禮之旨與藏書之法均精切不

刊林翼思慮若以祠堂爲書院較范氏義莊尤爲廣

大然亦惟先嚴之德則可耳敢不敬謹從事哉局中
師友皆正士名儒敬乞果臣變庵東谷濂卿諸先生
與梅村老友慎思審處以成此事其地則必倚依先
人塋墓宜山鄉不宜城市亂世用長兵燹可虞也此
閒軍事果敬慎不怠未必不可有爲如天憐皖難
人有敬畏之心或可已亂亦未可知

致金逸亭觀察

初十日

初五日以後音驛至今未到諒是冒雨拔營布置行
止情形何如各路未進或不宜急也滌帥原定四路
本是至計後因兵力不敷改爲三路又因賊勢之盛

并爲二路正月大戰則駸駸乎并一路矣因機因勢
原不可拘執爲膠柱契舟之見惟此後仍應分三路
一懷一桐一舒乃可得勢並另畱一軍備楚防作爲
霍六之援兼備樅陽之用應商事宜開列於後一訓
營三千四百人已撤霆營三千五百人已添六百人
又添二千二百五十人擬共添足六千二百五十人
須四月以後乃全若加以余之七營丁之三營共萬
餘人可備第四路兼守天堂防霍六商固更以便載
舟中襲樅陽鮑已請假四月弟只準三月此枝應駐
何處如何分法如何合法預擬及之一湘撫十五營

蔣道入營除凱右請病批調外共二十營不分拆營
伍而獨當一路其氣已固其勢已厚似可扼賊要害
有無應汰之營密酌以聞一多禮堂須獨統萬人弟
已許之查所部步兵十營須於得力之營各加五十
名共加三百名擬益以趙克彰朱希廣李雲麟其計
約七千人加以馬隊千三百人擬以楊得武五百黃
勝日六百陶茂林五百梁洪勝五百調歸多禮堂爲
一萬人則縱橫開合必能成功謀桐謀舒均請酌示
舒之地勢更利於騎且可杜廬州之賊窺伺六安之
逆謀也一滌帥處前有以蔣助圍之議惟雲巖與溶

川爲昆弟之盟則之不可統雲雲不可統之應仍歸
并湘撫一路但弱者須汰耳鄙意欲以幹臣率八百
加以英字三百餘人助之何如如應如此往返甚勞
而昌營卽須移入霍山矣一卽鎮千人已挑入靈營
二百三十名弟畱步撥七十名應以七百人暫撤歸
伍以阿參將久病也富龍伍可隨撫標當差一兵貴
有統無統之散營乞示之其稍弱者應撤以糧臺月
虧六七萬兩亦不能不兼籌及之一禮營蔣信玉楊
占魁聞其頗勇何如欲去兵以就餉而苦於難裁欲
欠餉而養兵而苦於積欠且爲我思之卽祈密復又

一切如何歸併如何撥調速卽籌示此密商之意切盼切盼又滌帥欲舒公速到霍山以重第三路以就其兵酌之

致莊蕙生方伯嚴渭春廉訪

初十日

得公函專指漢陽缺分一事尊意亦甚有是處馬稼軒名臣之孫又正派不失家聲弟之堅持奏銷後乃許卸事非不愛稼軒也錢漕有斷不可鬆勁之錫門限若失此禁約自亂其例則道揆法守蕩然無存自道光年以來國計之匱宦場之巧只爭此關耳公爲方伯錢漕是專政弟不過代公守法以求有千萬

之一當耳州縣之有礙奏銷者概不得更調其有緣案特參摘印提審者不在此限制之內至調署之員公前擬二人弟意尙未盡許公又擬孫繼祖調署且言論缺則黃陂優而漢陽絀弟思漢陽是升途且是首縣有關州縣之趨向卽有關於通省之風氣鄙人至愚惛惛然以爲不可幸爲婉謝如四月以後必須擇人則實缺中可調者甚多公試檢官冊查考大約合例可用者可揀入小邦卽乏才未必如此窘迫也冰如請修隄費桃汎不遠春工已誤不如待秋初大舉也

復栗仲然耀觀察初十日

禦侮無長策而先爲舉室避舍以生民心輿情驚顧
徬徨謠言日起墮軍實而長寇仇莫此爲甚潯川入
蜀已囑令渡湖取道荆宜以入夔州庶軍行無旁顧
之憂而鄂疆亦得備上游之勢仍由尊處函告近情
指示所向

致駱顓門中丞十一日

敝縣錢漕改折頓減昔年大半浮徵梓里蒙恩咸拜
仁人之賜故鄉父老仰體大君子良法美意於城鄉
設局催收每糧一石局費一百文亦聊以養在局人

之日食行之數年無弊昨以一紙書來謂此局將撤
知爲鄉紳經管不能假手書差遂以百錢經費爲詞
欲遂其變本加厲之私計將使老前輩恩加無窮之
意由此而隳壞於不知我亦蒼生能無顧恤謹將鄉
紳來函呈覽敬乞俯準輿情照常設局專札飭行於
另置經費田畝一節賜批飭縣刊碑立案以垂永久
則感激歡呼不僅一人一時已也

復多都護

十三日

兵事以固機勢爲先尤以通盤籌畫爲要刻下之局
安慶一路桐城一路舒六一路而舒六之地平廣曠

野利於騎兵且非勁旅不可也容遲日詳悉籌思再
行商請指示酌汰弱兵之議實因月虧七八萬兩鄂
力難支欲欠餉而養兵殊苦於積欠欲裁兵而節餉
又苦於難裁只可勉力支撐再四 奏乞但恐各省
疆吏付之不理則無如何矣訓營限期太促仍如來
示另展半月口糧稍資各勇歸囊以承盛意潛太兩
令才不才判然上下仁兄旌別自當實獲我心此閒
亦微有權衡前承皖撫之囑不得不遷就以承乏耳
滌帥念前軍血戰之勞推重館穀此意殊不可卻另
單分給軍糧仰見大將公忠雅度一視同仁士卒不

知何如感服也

復秦撫譚竹崖十三日

時事多艱江河日下我公經世長才中流砥柱維新
之治綱舉目張迭聽之餘能無額手稱慶規皖之師
水陸馬步六萬人飛輓久竭前臨大敵後指空囷欲
裁兵以節餉則苦於單弱難爲進取之資欲籌餉以
贍兵則早困轉輸不免飢驅之慮勢不能停兵待餉
致誤事機日夜焦思莫可言狀乞糴之舉永示籌畫
撥解軍情苦况望歲恆殷幸速惠而恤之則高義薄
雲銘感無既矣

致多都護 十六日

仁兄忠勤過甚憂勞爲 國不敢愛身自任勦援賊
以來單騎奔馳不遑寢食者五旬有餘日東征之利
全局賴之鐵石心肝曷勝感佩曷勝敬服刻下羸弱
未適尙冀寬心調養并不必拘定期弟與滌帥函
商分懷甯一路桐城一路其舒霍一路現只防兵二
千五百人欲作進取之計而實不能卽進也其安慶
一路因滌帥兵少弟已撥恆左右二營天堂禮左右
二營益之桐城一路以李公統蔣金余先行進發矣
仁兄馬步勇冠三軍擬請暫畱以資養息專備援賊

不逼城下蓋馬隊近城作爲圍師是舍所長而用所短也以馬步精兵救應各路他人之力有不逮賊匪之狡焉思逞皆可隨機應變肆出不窮蓋非仁者不能救人於危非勇者不能制賊之命也如異日懷桐兩軍並進則麾下紫青草塢桐城兩軍並進則麾下紫大關一帶彼此應援空靈萬變又或廬江舒城及楚邊有警均可因賊勢之所趨以兵策應惟仁兄機智神速騎步精良乃能如游龍在空飛行絕跡首尾變幻莫可端倪蓋欲求仁兄獨爲其難也弟意仁兄專任一路則馬隊不便於仰攻未足盡其妙用且狡

賊往往避尊軍之鋒若請仁兄以應變之才力顧大局則此賊必平不過半年一年東南可定矣且如此則商固武漢乃有恃無患不必再畱防兵以仁兄之才力可以保三省也昨已撥定步兵三千二百六十人餘容酌定再行奉聞因滌帥要去二千人霍山尙畱二千餘人弟處只六百人一時調撥不及也

蘇公遺集卷七十終